

摘藻堂四庫全書薈要

集部

欽定四庫全書薈要

集部

秋澗集卷二十七
五至

詳校官助教臣謝登雋



欽定四庫全書薈要卷一萬六千一百八十一


集部

秋澗集卷二十五

元 王惲 撰

七言絕句

五年夏四月朔日即事


朝衣締綌暮綿裘氣運天和不自由吹損綠陰風不定
晚來庭院似深秋

贈周幹臣

槐府潭潭吏隱周青衫騎馬亦風流入門休問生涯事

讀罷離騷待菊秋

題風雨回舟圖

江雨江烟萬里秋幾年汗漫事長游
憐君已落風波裏只恐回舟不自由

題王武子觀馬圖

玉華吹散滿身雲掣電追風隱駿奔
好尚祇誇毛骨異不思戎馬在東門

題李伯時所畫開元御馬圖

閱武驪山是近游霜蹄蹴踏厭長楸料應扈從東封了
一片烟雲赤岸秋

題山堂會琴圖

靜夜山堂萬籟沉抱琴來泄古人心箇中真趣知誰會
門外松風是賞音

聖賢思治先琴事子賤為邦舜阜民莫訝松軒來會數
要從心指起經綸

寄潞尹侯伯祿

分攜不及都門別情話長懷午夜燈蘭省未妨虛儉幕
郡人爭喜識黃丞

太行絕頂潞州城竹馬兒童遠見迎聞說下車公事簡
不勞衙鼓報新聲

題李伯時畫支遁觀馬圖

晉人大槩尚虛談外物遷移等狗貪千丈神光渠自有
却將風駿馬中參

金城店

麻葉翻風稻映畦道邊垂柳蔭橫溪一竿青旆誰家酒
金店東頭野釣西

金城懷古

典午能延邂逅生柘弓銀研未忘情較量成濟揮戈慘
天道中還固未平

絳陽道中

山自南來兩翼開分岡橫亘隔金臺伯宗驅傳無輕去
聽取與人論絳災

絳州公解即事

終朝據案訊累囚，日暗風淒動鬼幽。
草黯池荒人不見，絳紗燈影看懸流。

河東池館絳園優，才守豪王樂讌遊。
興

見

斛王祠畔暮山稠

挈鷺提鷗次第開，碧圍丹障鎖重臺。
可憐一炬成焦土，却似阿房為世哀。

樊守文章世已驚，富公遺愛

闕

水

假借羣蛙徹夜鳴

鼓水西來竇北墉絳園形勝日增雄依稀罨畫樓臺影
猶在瑤翻碧潏中

水聲激激枕邊來卧看倡池碧鑑開三尺短碑樊記在
苦無多意發雄猜

莽望黃原勢接天驚驂南走削孤顛東臺何限消沉意
目送汾流落日邊

讀絳陽園池記

樊守文章未易窺艱深宜被後人譏一言能盡興衰理
愛殺當年李格非

周孔文章載道輒定刪元自典謨留不知魁紀操觚意
地絕天通孰與儔

題斛律王廟壁

玉壁威騰却日戈飛搖其奈伯升歌須知地下陂陀血
氣壓南山翠不磨

祝融堆廩表韓公神理雖冥正可通自愧不求來折獄

亦蒙險相誘愚衷

過絳州北哺饑坂

晉趙宣子飯靈輒處也舊有祠屋今廢

釣采華名世有人微勞高擬泰山勲此心報德誠堪尚
事了身名兩不聞

血肉縶牙白晝寒挾輪來脫趙卿艱悠悠鶴蓋陰中子
高揖清風恐厚顏

晉國平時有殍夫趙宣為政果何如哺饑坡下重回首
一飯酬恩寔起予

題夏當務壁

村落人家櫛比稠
平時分水細為籌
朝來一雨郊原足
門外長溝滿意流

龍祠禱雨

巾岸烏紗角半摧
馬蹄泥滑晚相催
罷人莫訝麻衣濕
適自龍祠禱雨回

禱雨龍祠訪張總判不遇因題其壁

甲第分攜半月餘
遠回相過得須臾
松陰滿院溪流碧

辜負臨風一捋鬚

登白雲樓

百日區區簿領間
白雲樓閣幾憑欄
秋來政有西山爽
兩度還容拄笏看

山沈雲高暑退初
簟紋如水葛衣疎
邇來郡府無多事
卧對西山把性書

贈墨卿秦得真

壯心零落羽林槍
老劑玄圭入退藏
為報鳳凰池上客

不應神品擅潘張

麝團小印柳枝龍不減唐人入漆工留得玉堂揮翰日

桂香欄檻聽松風

聽一作泛

秋望

客窻十日雨聲中雲影朝來綻碧空不上西樓能幾日
滿城黃葉動西風

題子猷山陰圖

閉門一雪天地白乘興即上山陰船愛殺此君真率意

至今人境兩脩然

自嘲

踏月聞雞出艸齋
逐朝撾鼓放衙來
盤盤三晉河山地
兵賦民情使汝諧

自壽

二年岱頂富奇觀
今歲姑山對霧鬟
笑拂巖花指歸路
黃塵深處是人間

待旦軒假寐而作

待旦軒虛曙色分
瓦爐煙煖有餘薰
細思日用無多事
一靜能消萬有紛

題永安刁氏別墅壁

一川百頃數家邨
瓊嶺重岡擁澗垠
樹藝自勤民自儉
勸民冠蓋不須傾

南崖刻劃似城闔
北勢耕桑聚落勻
所願廟堂論至理
萬方風俗再還醇

聚遠亭刁氏別墅

壁間題示墨猶新聚遠軒中入幕賓還喜晉人風土舊
一邨名姓似朱陳

英武王馬燧廟

西平英氣凜如生千古精忠勒御名過客賦詩增感激
北風原上鼓輦聲

奔鯨吹浪蕩蒲津堂上奇兵筭已神老賊垂降還赴召
比量先軫乃純臣

汾睢懷古三首

坤倪三面削蒼崖中擁汾睢寶氣開夾道老槐君莫訝
虬枝曾拂漢旗來

武皇誇大喜雄為鼎出汾陰恐事奇更著壽王相嫵媚
守經深見漢儒卑

東封泰岱西汾陰始自嬴劉好侈心只為一非無所格
儘令方士出妖淫

過聞喜縣有懷元鼎故事

窮兵無似漢皇雄六合為家意未充一喜政能留故事

舞干終愧有虞風

過太寧宮

披雲臺晚野烟荒
宮掖坊深半夕陽
獨有太寧祠畔土
碧花猶自學宮粧

安邑道中

匡牆煙火暮微茫
樂歲人家半未康
漢至孝文纔四葉
便能三萬里農桑

謁司馬溫公墓

河山兩界夏西分
孕秀鍾靈產異人
可惜秉鈞纔八月
不教仁澤浸生民

鳴條山遠聳孤墳
千古嵩高仰甫申
有意誕彌無實用
竟將新法逐諛臣

遊棲巖寺八絕

上盡雲間十二盤
一杯松下散襟顏
老僧近晚堅留客
爭指西南見華山

河山形勝見棲巖
萬壑秋聲度碧杉
奇絕此遊還有恨

杖藜不到冷雲菴

翠巖迴抱鬱蒼顏絕境軒橫杳靄間
老矣瑞峯應健在護持長伴八龍閒

一徑縈紆入杳冥望川亭迴夕陽明
欲知眼界寬多少放出秦川似掌平

層巖重倚尚斜陽山下風煙一抹蒼
恨煞愛山王老子不來同宿贊公房

暮烟遮斷嶽蓮青低壓河流一線明
已被山靈嫌俗駕

更堪留榜彥倫名

安然乘馬到烟蘿一笑山間對鳥窠詩句滿前拈不得

一作
出風煙還比石樓多

鐘聲出谷尚依依穩送詩人帶暝歸自笑野猿山鳥性
夜深幽夢到巖扉

贈寫真賈生

氣貌昂藏野鶴姿賈生模寫有餘師情知不入麒麟畫
剛為天朝飾羽儀

跋提刑王副使航海圖

天險無踰海與江得人一葦即能航懸知恢廓高宗志
夢繞商巖夜月蒼

鯨翻鼉作大江流舟楫顛危咽棹謳忽展畫圖還自悟
當年風雨過封丘

遊普救寺

晚寺人歸憶會真夢雲花氣鎖窻春重簾不隔西廂月
一點香來是襪塵

讀破口先事迹

釋氏工夫向上尋一身歸寂雪山陰
片言能脫盈城命
少似先公濟物心

贈船篷姚道人

一龕塊坐已忘身陸海船篷別有春
却為梨花枝上雪
等閒踏破綠苔茵

臨晉道中

野雪晴消滿道泥茫茫銀海際烟霏日斜信馬中條北

愛煞山光照客衣

春雪

小雪霏微不滿空
亂穿庭樹舞春風
餘威似掣調元肘
不與東皇擅化工

曳龜圖

馭說瀾翻已自欺
更堪身世兩相遺
抱麟痛為東周泣
爭遣宣尼不及時

公堂午吏散一首

吏散公庭日轉西
蟻旋蜂靜閑無時
人無定志常居遠
悄悄孤懷祇自知

清明後一日作

里巷春逢鬪鈿車
午窗睡起日西斜
閒書讀罷焚香坐
淡對一枝山杏花

卧數窻櫺對日曛
一簾晴影弄游塵
隣牆幾片桃花雨
點破苔堦更可人

懊惱春棕困宿醒
偶隨游子到溪亭
多情幾樹城南柳

三度春風見汝青

跋李提點和甫筠溪亭

和甫開封人早年應神童筠溪其家園亭也

碧鮮庭戶玉琤琮影透疎簾翠幾重中有道人高節在
青青初不易秋冬

洗耳無煩近潁川虛心獨愛此君賢何時拄杖敲門去
讀罷離騷聽夜泉

題鄆縣簿雷損之景程齋詩卷

道統幾微孰繼傳景程還得此名賢須知二帝三王事
要以仁民愛物先

理窟名言婉典墳發源伊洛見經綸千年鄴杜遺風在
更着雷卿繼後塵

題田使者玉泉垂釣圖

渭畋應未兆非熊底是曾蟠萬丈虹辨與澄湖三百頃
一絲斜裊綠楊風

挽平陽教授崔君度

心醉羣經四十年老成身後見波瀾
蒼涼一片姑山月
空照先生首宿盤

孟浩然灞橋圖

金鑾消息遠相招雪滿吟鞍過灞橋
處士本無經世志
強將詩句度清朝

高鳳漂麥圖

疾雷破柱雨翻盆甌墮何煩顧
惜頻倘為把書都不省
先生應是太癡人

跋蘇武持節圖

使華往返見交兵老我何嘗繫重輕已分橫身膏草野
茂陵松柏夢秋聲

君臣義合以忠持十九年間節可知邂逅論闕幾侮沉
區區纔得典諸夷

兩行衰淚血沾襟一節酌恩北海深衛律有知慙即死
更來游說此何心

慶趙汲古八秩之壽

效樂
天體

人生八十今極壽
況復兒孫滿眼前
汲古園中趙夫子
燕京城裏地行仙

摩挲金狄門前客
精健耆英會裏人
坐對天津橋畔月
池塘春草幾回新

崇慶初年縈組綬
至元八載享康寧
人間八秩風流事
無似君家種德馨

至元辛未歲八月十二日喇嘛都事才卿遊韓
氏南莊歸效樂天體得詩十絕皆書目前所

見覺信手拈來也

開門不問主人無幽鳥呼來應竹呼僮僕已知賓客敬
與奴白飯馬青芻

吟邊踏破綠苔堦自挂幽軒數菊栽半日杖藜橫膝坐
絕勝前日醉歌來

浮雲冠蓋六街塵老盡朱顏白髮新贏得身心兩閒在
水邊林下果何人

滿庭竹影鎖秋烟倒盡池蓮一菊斑牆外綠畦澆已徧

暮園秋老桔槔間

深林兀坐淡忘機
山鳥山花笑我癡
萬事看來皆偶爾
此間休遣世人知

亭臺涼吹晚留連
樹遶岡回自一川
野菽未霜溪柳盡
烟光渾是早秋天

陶園松菊餘秋色
趙氏林亭滿夕霏
人自晚年便靜暇
每來吟賞便忘歸

溪雲烟樹事幽尋
指點平蕪起醉吟
但使眼前無俗子

一杯時與野人斟

醉墨淋漓字半斜
枉將霜壁亂雲遮
一杯先洗黃泥瘡
似我閒情遠世譁

蛙鳴水底強為聲
酒盡沙頭卧玉餅
我自近來無不是
白雲舒卷暮山青

裴晉公綠野探梅圖

息軒
筆

淮西平後兩河清
綠野梅花照眼明
霜鬢未容閒裏老
南枝消息要和羹

當年韓白兩詞人吟賞天教在相門邂逅有詩窮勝事
最憐疎影月黃昏

東臯八咏為趙參謀題

匏瓜亭

君家匏瓜盡樽彝金玉雖良適用齊為報主人多釀酒
葫蘆從此大家題

幸齋

人生知足一瓢多未老得閒非幸何堪笑矯情楊子幼

鳴鳴空縱醉時歌

東臯邨

陽春門外望東臯三載相邀醉濁醪
早晚回溪溪上路
桃花紅雨滿漁舸

耘軒

草盛苗稀苦見侵荷鋤歸晚月生林
須知種豆南山意
惟有淵明識此心

遐觀臺

自說無堪不出村一杯藜藿樂閒身就中不負登臨興
滿眼青山是故人

清斯池

塵冠挂後無纓濯漁父從歌濁與清待與田家占水旱
年年池上聽蛙聲

流憩園

養素丘園趣已成斜陽林影看春耕手中三尺枯藤杖
不羨人間六印榮

歸雲臺

從龍致雨固油然巖壑歸飛意本閒
況是東臯已沾足不妨來伴宿簷間

夢中又賦開元御馬圖

毛龍天降馭龍韜
歷塊過都乃爾曹
安得錦韉三萬騎
令浮秋水下江臯

予寓舍前有所謂水官珠者客曰此即薏苡也
因呼兒採實作詩以識之

堂前薏苡因人悟不處嫌疑信至言豈獨菲萋成貝錦
令人還憾伏波冤

讀開元雜事

水殿涼多暑氣微薰風華萼正相輝爭教明月梨花院
玉笛聲長到枕幃

興慶宮池景氣深薰然四海友于心讓皇篤愛情尤切
力為君王辨八音

海棠紅綴棣華零樂裡西涼已變聲總把大衾長枕夢

老天移魄入華清

歸去來圖

長沙勲業武侯忠
劉宋規摹操懿雄
虐焰儘烘寰宇裂
五株楊柳自春風

彭澤遺黎不幸何
斜川魚鳥共婆娑
先生踐迹高千古
不似終南捷徑多

解綬歸來百日強
東籬松菊未全荒
細觀厯贊高賢傳
一出頭來恨已長

煮茶

枯腸拍塞貯春雲
洗盡囂煩六腑昏
山木策勲存夜氣
天河流潤下崑崙

胷中宿酒闕殘兵
一椀澆來敵陣平
濛頂得仙疑妄語
月波千丈與詩清

瀟瀟風雪薄虛窻
細貯槍旗煮夜缸
若論廓清真武事
一天幽思為詩降

四皓圖

羽翼橫飛四皓鴻
楚歌悲絕趙王宮
高皇英睿商賢節
俱墮留侯計畫中

萬古規模一漢皇
保全母后捨僂王
商山邂逅招園綺
出自留侯畏呂強

題楊息軒盤谷圖

石峪盤盤百畝蒿
野煙秋色淡林皋
雄文一出潮陽筆
頓覺山人索價高

關山秋霽圖

望京樓上晚凭欄
常記居庸八月還
一段紫烟吟不盡
枉分秋色與南山

生平懷霽是初心
捲盡江山萬里陰
十載夕佳亭上客
卷中還對玉千岑

甯戚叩角圖

舜授堯傳老不逢
商歌愁絕國門東
小哉恨煞夷吾器
竟列齊桓五霸中

五王避暑圖

挈幄留香郁棣華紅雲縈暖鵲鴿沙豆其不免陳思嘆
朱李寒泉是浪誇

蓮鳥窺魚圖

嘴距初非搏擊流翠香深處樂清幽游魚何限相吞噬
祇得臨風一瞪休

門帖子

廩食京華兩見春全家飽煖荷深恩自慙補報應無地
夢到青蒲白獸尊

題袁安卧雪圖

曲突無烟雪擁關引書高卧自怡顏須知四世三公業
不在人情冷煖間

突不烟黔雪擁扉一編義易療朝饑火城莫羨沙堤相
論士當觀未遇時

窮巷無人與叩關長安風雪一家寒挺然不為飢驅去
肯逐時人作熱官

題顯宗承華殿墨戲

大青小青兩龍種承華墨戲真天人春思欲見昇平事
立仗歸來不動塵

題東海徐白魚

點額雷燒不到渠相忘何必在江湖細吹藻荇充饑了
兩頷腥涎儘自濡

酹祭宋先生子岳六首

山立揚休七十春閒中今古醉中真傷心麗澤堂前月
空照先生漉酒巾

一代波瀾獨老成百年人物見耆英茂陵身後多遺藁
一賦梅花到廣平

我識空澄海印心生平遊戲在禪林寶珠儘照青藜杖
雅韻先空綠綺琴

玉堂仙去渺翩翩冷落梅花樹下禪疇昔過庭言在耳
炷香傾酒大蘇前

水映林亭竹映山四時風景樂天閒一從零落丘山夢
頓覺風光向客慳

酒榼詩筒白玉珂
春風到處是行窩
百年愛仰都人士
哀比羊曇淚更多

跋龍陽松隱圖

學君象數別穿深
又向龍陽得洗心
前日小山叢桂客
不煩春草賦歸吟

承華殿墨戲圖

天旒雲屯八尺龍
總輸神駿付青宮
細看絕電流雲筆
天寶諸王恐未工

主人愛馬憐神駿一骨千金十籟藏却恐雷霆還下取
九重天上看龍驤

感寓

逢人驚問但慙然自信文章老益堅來坐癡牀一千日
恰如無事草鞋禪

至元七年十月廿二日過順州與梁御史話金
節侯剛忠王公子明死節事馬上為賦此詩
以弔州舊治唐歸順州見大厯五年試太子

洗馬鄭宣力所撰開元寺碑

雉堞蜿蜒隱塊城剛忠於此歿天兵千年英氣如生在
草木風前動戰聲

題趙仲器銅芝膽瓶滴

陂陀金背兩眉蘇不屬官池與研居老筆策勲餘潤在
一生何啻五車書

足跡蹢躅几研間太陰何苦汝為餐寸腸不磔盧仝鐵
更吐陰寒上筆端

題張夢卿雙清圖

月影冰魂奪化工
捋鬚直是不煩公
漫山正有閒桃李
爛漫春風幾日紅

花光品格黃華筆
一段風流付後人
誰為九衢塵坌底
兩枝搖蕩浙江春

淡粧疎影兩依依
點綴橫斜畫總宜
恰似孤山籬落畔
小溪如練月如眉

王右丞輞川圖

騷詠禪談意未央
歆湖煙月墮微茫
園林鐘鼓清時樂
好個裴公綠野堂

狀物何如及物功
開元真宰說姚崇
未妨僦屋招提裏
斗米三錢四海同

凝碧池邊野鹿過
空垂雙泣賦悲歌
論忠不到平原列
馳譽丹青未足多

文采風流映一時
丹青三昧有餘師
戲將萬斛歆湖水
寫盡南山五字詩

遷張氏新居四首

我自三遷到吳隅市朝雖近似郊居東隣有竇西隣許
不羨門多長者車

院靜窻虛淑景閒戎葵凝笑海榴丹莫令兒輩輕傷折
為與渠儂理一般

聽雪思堂與筆耕主人寓意強為名錙銖得及斯民了
日出何妨事又生

羞將勲業鏡中看不為無魚動鈇彈兩鬢總隨霜簡白

寸心虛傍日華丹

題秋江月夜摘阮圖

玄辟朱絃激烈聞縱橫詞舌得儀秦忘言何似陶元亮
直作羲皇向上人

易水悲風動急彈小絃鏗爾摘銅丸多應一片松梢月
併入茅亭作夜寒

闕下元日口號五首

筍班春仗簇初齊贊馬行牽望拜時臘雪未消雙鳳瓦

春風先到萬年枝

平明瑞雪滿蓬萊
島樹瓊花次第開
人在建章馳道外
四邊鞍馬唱歌來

建章宮樹玉嶙峋
雲近蓬萊氣自春
帳殿忽開齊舞蹈
紫衣獨見海東人

春前移仗島東邊
大禮稱觴最重年
何幸小臣陪虎拜
一杯春露共瞻天

千官錫宴瞻天喜
萬里休兵立仗閒
擬效堯封三獻祝

太平天子壽南山

魏豹故城

兵涉西河豹出迎亡姬還作漢儀程事機倚伏真相戲
一笑長驅過故城

題解梁解壁

丘壘依稀井幹殘人家煙火甫兵還就中不負官曹眼
簿領堂前坐看山

再過絳陽

二年三度過金臺盛暑祁寒不憚懷卧聽水聲何所憶
一軒秋雨竹間來

夜宿李氏林館

困眠欹枕未容休睡起關心事最幽鷓鴣一聲窻色曙
月明滿地綠陰稠

禹廟

大地河山繡錯明野烟孤廟枕荒城杜鵑饒舌知何事
血洒東風怨未平

路村道中

鹽澤條山動寵光天書來圻紫泥香老癯扶杖欣相告
五十年來未省嘗

解州廳壁題示

至元癸酉五月二十三日奉宣明詔至於解梁因得
王貴州壁間所題解池詩序云鹽池之大自唐以來
凡臨莅者無一辭以紀勝槩觀覽之際賁然成章或
繼之者寔自予始僕竊有所感焉因勉成三詩以附

驥尾之末庶幾因公而使天下知有惲云偕來者府
兵曹解禎子公孺侍行承直郎平陽總判汲郡王惲
題

物色分留付後人暗將風雅欲誰親琨珠在側知形穢
尚友何妨繼後塵

日融池面爛生紅更看南山障碧空一夜高臺汗如洗
州人說是廣南風

解梁城下解鹽池萬寶騰光奪目暉我欲大觀窮化窟

乳泉一賦了天機

秋澗集卷二十五

欽定四庫全書薈要卷一萬六千一百八十二

集部

秋澗集卷二十六

元 王惲 撰

七言絕句

華嶽廟留題

朝來松檜重烟霏
仰面蓮峯翠撲衣
自笑愛山心不足
日斜猶未駐征騑

祠前喬木老輪囷
閱盡長安道上人
千古倚空仙掌在
好為回首障兵塵

蓮峯卓拔見雄尊，千劫孤撐碧玉盆。
總被少陵收拾却，諸山羅列似兒孫。

垂崖一出著高勲，回首猶慙華頂雲。
應笑豹林种處士，擬將虛譽售時君。

東登岱頂雪彌空，上徹中封似不逢。
應闕此行何豁敞，青天白日對三峯。

渡渭有感

當年尚父欲誰親，八十西京釣渭濱。
馬上行人應未了，

莫教虛負百年身

秦亡漢起兩悠悠
攄把興亡入海流
汀樹岸花三百曲
烟波都屬釣魚舟

安邑道中

六合雲蒸一氣埋
際空秋稼委枯荄
馬頭赤日疑無色
望際青林雨氣來

洪洞道中望霍岳諸峯

老澗灣環兩翼分
一川草木氣如薰
土人更說山靈異

欲雨先占霧頂雲

留題霍嶽

喜遂平時景霍心適逢嚴祀一登臨感通固愧潮陽筆
霧雨重開萬壑陰

山腰明霽靜烟霏嶽頂雲濛淡欲飛巖壑似供詩筆健
法身都挂六銖衣

題豫讓橋

死堅鐵石表孤忠一水曾蟠萬丈虹太史注書隨俠例

豈知風義本無同

過益昌橋

盤盤危磴轉山腰下瞰長河漲怒濤
霍邑南邊趙城北
滿頭風雨過昌橋

霍州

四擁中坳一拳牢快心惟有霍山高
一條潁水從中過
日夜隔城聞怒號

跋范蠡歸湖圖

霸越高勲土苴如五湖歸隱號陶朱扁舟共載西施去
却恐時人是厚誣

題趙城縣環翠亭

秀色四圍供坐嘯山城終歲早休衙陂塘清淺知秧稻
畝嶺橫縱看藝麻

簡城南北幾經還赤日紅塵赭背顏歛得解鞍心適喜
暫容高卧對東山

趙城道中早發

積雨晴來露氣餘
風枝成滴草垂珠
麻衣半濕溪邊路
常記郊原五月居

跋米元章蘆鴈圖

西風萬里下衡陽
水宿雲飛固自雙
似為叫羣心事苦
不教相映睡秋江

煙渚潮空退暮沙
依稀寒影落蒹葭
何人解化雙飛翼
拍拍隨君問使華

甲戌歲門帖子

全家溫飽荷恩榮
闔郡清寧歲屢登
蟻虱小臣何所報
一公之外復何能

不求富有金成穴
不羨官榮日九遷
但願時和身健在
大家無事過今年

庖舍門帖子

王家供具乳蒸豚
石氏庖厨蠟代薪
二者侈荒何足論
一簞顏巷世歸仁

山市晴嵐

墟落人家半夕暉
太行天上倚烟霏
喚回二十年前夢
共伯城西載酒歸

古柏寒鴉

亂鴉蒼柏晚相依
流水孤邨句未奇
恰似首陽祠下看
夕光翻影上枯枝

松蔭寒泉

坐蔭髯龍夢已醒
更堪幽谷亂泉聲
遙知綠綺相逢夜
幽思中含太古情

雲竇飛湍

千丈懸淙落碧霄百巖回望冷瀟瀟
若為借得天瓢手
傾向人間救旱苗

蒲中十詠為巖卿師君賦

并序

中條山水雄秀照映河華予兩年以事抵蒲略獲遊
賞然雲烟勝槩旦夕不去其懷嘗思以數語道其髣
髴心在而未暇也至元十年秋九月蒲人師巖卿拉
王國器李仲和張師德諸人攜酒過門杯數行袖出

錦囊巨軸曰此蒲中十詠也因徵詩於不肖逮明年
甲戌正月辛巳予以微恙閉閣少休隱几瞑坐神與
境會既覺晴日滿窻幽思發越眷焉十題卒然而就
顧不足發山水之清音聊以移方寸而外形骸也且
為四老人一胡廬云

蒲津晚渡

落日西風送棹謳行人無數立沙頭君看一葉顛危甚
若不忙時且少休

舜殿薰風

巖廊瀟洒壓城闔解慍歌殘又幾春一道殿簷涼似水
至今猶有夢華人

虞坂曉發

雞聲茅店月微茫山遠行人促曉裝良驥虺隤身自健
不須拭目認孫陽

首陽晴雪

前冬兩拜首陽祠野雪搖光晚霽時蒼柏滿山人欲去

亂鴉翻影上枯枝

鶴鵲波聲

洶洶河流入斷山
馮夷無力障狂瀾
東風破浪他年事
且挽清雄上筆端

東林夜雨

瀟瀟風雨暗秋山
聲滿疎林萬珮環
拂曉開門看晴霽
白雲依舊伴僧閒

林亭夜月

大內扶君不見人野煙碧樹總傷神應憐一片林亭月
曾照司空淚滿襟

王官飛湍

石竇懸流雪練飛夜深和月映松扉恨予不遇貽溪老
一笑山間說化機

西巖疊巘

東山如髻鬱重重人倚西巖第一峰似是晚烟開畫障
濃揮淡抹鬬丰容

嬌汭夕陽

溪痕春漲碧迢迢一帶斜陽映野橋
風土亦安釐降意
野花如靨點裙腰

秋澗集卷二十六

欽定四庫全書薈要卷一萬六千一百八十三

集部

秋澗集卷二十七

元 王惲 撰

七言絕句

過文貞宋公墓

廣州去闕幾千里中使銜恩信貴僚莫訝簡驩無一語
太平勲業見風標

沙丘宮

齊梁霸趙何雄壯探轂因鋒遽懦庸千古興亡酷相似

武靈而後有莊宗

柏鄉道中

聯鑣時喜笑談開不覺淒風漲面埃
曉日迫亭橋畔路
青山一道柳邊來

大都小雪時聞兩廣捷至

雪翻廣陌飄梅粉雲覆宮牆抹竹烟
預為新年傳喜慶
捷書一夜到甘泉

宮杖亡宋物也左丞姚公以上所賜出示座客

故有此作

效王
建體

六宮催上木蘭舟
百色輸來不敢留
親見紫宸新製杖
金盤龍地玉虬頭

過中山府

紅旗鐵馬響春冰
儒將清邊世莫驚
遼吏不知塘泊險
使來先問二蘇名

過梁門

漠漠蒼溟海氣靈
銅梁此照遂城開
不知坡漲能遮甚

萬騎數淵索戰來

毳幕卓歇圖

牙旗風軟馬蕭蕭渭水歸來氣更豪
想得龍沙西北道
際天秋草黑山高

題花光墨梅二絕

蜀僧超然字仲仁居衡陽花光山
避靖康亂徙江南
之柯山與參政陳簡齋並舍而居
山谷所謂研墨作
梅超凡入聖法當冠四海而名後世
嘗有移船來近

花光住寫盡南枝與北枝之句其丰度可想見矣趙
雲夢題云如王謝子弟倒冠落佩舉止欲傾自有一
種風味蓋前朝高丞相家物暗香疎影溪雪春風四
圖今失其溪雪見為宋漢臣所收僧號花光道人山
谷少游皆贈以詩者

滿溪明月影扶疎只枉緇塵照雪膚展放畫圖還記得
孤山籬落漲西湖

破墨能開雪裏芳道人花供老猶香移船要近花光住

笑殺涪公有底忙

裕卿李兄來別復效樂天體以贈

晤語從游喜任真玉堂僧舍幾相親
河梁莫厭重攜手明日共為千里人

題朱彥暉三陪手卷

謂水菴陪飯竇漢卿陪針陳學士陪口也陳名時可

字秀

余年五十覺籠東左臂偏枯右耳聾
說道燕城陪手客此針傳授到朱公

江村訪友圖

江東宰相說風流
賈嗣吳潛果孰優
今日國亡公道出
時須來訂晉陽秋

廉公作牧古無雙
聞道旌招別楚邦
何計挽留闕我
似來謀及鹿門龐

兩椽茅屋枕江濱
杖屨來敲月下門
不是愛梅多看竹
冷香疎影坐黃昏

韓幹畫照夜白圖

開元天子燕遊多一骨承恩玉色枯所養自來非所用
雨中蜀棧要青驪

纓被騶衣一色紅玉華光照苑門空昭陵六駿秋風裏
辛苦文皇百戰功

沉香亭下牡丹芳宮漏穿花夜宴央輦路傳呼停鳳燭
內家歸詫玉麟光

松憲雜錄云開元中明皇嘗乘照
夜白與楊太真賞牡丹于沉香亭

政捐金鑑九齡歸聲色糊塗醉不知天意種深天寶禍
故生尤物配妖姬

題何侍御所藏雪霽江行圖

雪霽澄江照眼開
常年十月蔽兵埃
而今風物真堪畫
滾滾行商兩浙來

柏臺霜信肅江楓
寒入黃茅瘴已空
一線暮江春雪外
枉將新意詫清雄

炎瘴清殘一雪餘
勾吳無地不亨衢
江山正要燕公筆
却點騾綱入畫圖

滕王蛺蝶圖

劉侍御
家藏

兩翅輕翾暈粉金
內人無計撲羅襟
南昌閣底花如霧
迷殺春香一寸心

槐壤紛紛事暫歡
枕中栩栩伴周闌
丹青欲識滕王意
須着人間此夢閒

粉香金翠夢能甜
細寫春棕入筆尖
却恐尋香飛便去
六宮爭下水晶簾

王建宮詞有傳得
滕王蛺蝶圖之句

夏日玉堂即事

悠悠時事百年心
歲月徒成昨與今
萬一寸長能及物

不愁華髮已盈簪

失時已抱周人恨
濟物常深永叔懷
鈴索不鳴朝日靜
坐看簾影轉苔堦

世願登瀛不作卿
玉堂更比憲臺清
只緣白獸樽中醴
當日元王為穆生

陰陰槐幄幕閒庭
靜似藍田縣事廳
細草近緣春雨過
映堦侵戶一時青

日長上直玉堂廬
思入閒雲待卷舒
重為盛時難再遇

等閒羞老蠹書魚

故開府儀同三司中書左丞相贈太尉謚忠武

史公挽詞

并序

維大元國至元十二年歲乙亥二月七日中書左丞
相忠武史公以疾薨于位訃聞天下痛悼嘆哲人之
云亡哀斯民之無祿在某又有感焉而不能已者初
壬子歲公受封于衛其年秋來視師某以諸生故事
上謁特睞焉錄用實資籍之俾進其所未至以需闕

不逮中統建號之明歲公入當鈞軸時某掌記中堂
館門下者半歲首奏擢時翰林修撰兼內省都司既
而以事註誤得公辨明免歸至元改元總尹都督移
鎮東魯辟某充幕官遵公命也公之意蓋欲革舊事
行新用也九年壬申由御史得調平陽謁公授嗾去
曰若綿力頗久同列貴和餘復何云明年朝議經制
南伐詔公開府襄州節制諸軍又將以僚屬召尋興
疾北還事雖不果於菲薄實加重嗚呼昔韓愈從事

汴州於隴西公有惓惓不忘者在悲中令為可知不
肖某何敢望昌黎之清光而忠武勲德為世宗臣遠
邁中令而某也始終沐公裁成卯翼使聲光燭耀於
時其感戴當何如哉一旦遡大樹之悲風痛吾儕之
安仰此李平廖直淚下而沾襟者也爰賡薤露之歌
用表素旂之末前十章頌公德業之萬一後五章攄
平昔顧遇辱知之厚傳武侯於近代敢躡蹤張栻之
知贊充國於麟臺庶張本揚雄之作尚冀神靈鑒茲

誠惓其詞曰

補袞功深作帝箴
片言能沛萬方霖
白頭無地酬知己
重為蒼生淚滿襟

寇鄧高勲上將材
丹青圖畫冠雲臺
舉頭納納乾坤大
辛苦中原百戰來

南臨江漢北無垠
英衛軍機祐預仁
百代盛從青史見
漢家羣后有元臣

遺表陳情不及私
南征無嗜殺為嬉
身雖不覩吳平後

羊祜恩威有素規

元勲高在麒麟上曠度初無智勇名欲見令公陰德厚
一門八子總公卿

幾年黃閣見調元福浸蒼生奠枕安兩號改元幾二紀
不教波及海南天

閭節堂堂五路尊繼承諸侄動天閤推恩不為夷齊讓
要慰先臣地下魂

身後論功誓不磨德鐫高塚鬱嵒差千年零落丘山底

忍聽唐饒作露歌

上計歸來愈謹忠又從潜邸識真龍十年浴鳳池邊夢
不到歌鐘甲第雄

逆齊節志竊桓文鯨鬣翻波海氣昏堂上有兵能制勝

一言料死芷中豚

時予都司中堂公開逆糧突入濟南
有殲入圍無能為之句至成擒竟如

料所

先皇登極公封衛賞識初緣啟事陳二十年間門下客
愧無椽筆贊經綸

昂藏綠野堂前鶴飲啄當年在鳳池一諾見推連省署

九泉埋骨荷深知

中統一年余在上都
公館日陪侍左右

幕圍火烈燕巢傾此際誰能託死生一語保全微命去
聖安方丈記辭行

拂衣歸去老田園木屑筠頭苦見憐尺一起為蓮幕客
東平門下又三年

征南開府控襄州舒也何為預唱籌報德愧無千字誄
峴山南望淚空流

萬壽節同宋太常出左掖門口號

禁漏穿花夜已央
宮槐籠曉色蒼蒼
慙慙一點東華日
先到紅鸞扇影光

隔夜端門分板位
平明簪笏列鵷行
紫行低覆千官拜
潤入金爐百和香

羯鼓聲高吹管清
九天合作鳳鸞鳴
侍儀贊唱三成後
罄折齊呼萬壽聲

花映巖廊近紫宸
宮官行酒過三巡
共攜滿袖香烟出

散作都城十日春

對品班分玉筍行一時望拜殿西廂百官燕出宮闈靜
疎雨濛濛濕建章

過王太師廟

在壽張縣
西三十里

老雨莓苔滿露臺野堂花映廟門開地中鐵戟消沉盡
時有陰風樹杪來

題開州驛亭壁

并序

昔有宋之三葉也遼人大舉入寇南抵澶淵有併吞

席卷之勢堯叟以蜀產主議西巡欽若以吳人請狩
建業社稷安危在此一舉萊公審勢明料敵果挺不
拔之忠任投瓊之責奮不顧身竟夷國難當時遼舉
國之兵膽已墮公北狩一言奚待斃延壽一矢之力
也庚申秋予應辟東魯道出是邦按轡周覽想河流
之奔洶仰壁壘之雄峻斯亦宋之金湯也遂盤礴回
鑾碑下慨然有懷古人臨大節處大難胷中素有所
定不然淮陰以漢中畧對烏得還定三秦武侯以南

陽一論遽能西取劉璋東向以爭天下者哉

幸蜀巡吳避銳鋒竟從孤注助天功千年草木餘威在
野老猶能說寇公

顯宗畫三教晤言圖

兩晉玄風倡永嘉晤言新意出承華後人莫作無同論
剖破藩籬即大家

微言初不出吾書正恐雄誇涉誕虛座上若拈花葉問
發端當自仲尼居

承華宸翰日重光大定聲明有父皇若以撫軍監國論
長沙書疏未容忘

緇衣蔽路樂清修羽客談玄日自由眼孔似憐吾輩小

終年平地看錢流

為儒戶印
造寶鈔

鬢絲禪榻喜相依休問珠英果是非已着孔林殘照裏
青衿漸染變緇衣

徽宗臨張萱宮騎圖

缺胯頽衫玉帶圍駿華翻影下瑤池老徽筆底無留思

貌盡春風出閣儀

碧暈紅綢思有餘較來經國太工夫大風歌裏雲飛遠
不畏高皇笑煞渠

戊寅歲燕都元夕

萬家簫鼓憶升平九陌銀華璧月澄此夕薊門南北望
風簷隨分兩三燈

九齡忠諫圖

挺笏摧姦論已萌帝心惟恐悞忠貞開元所事呈來足

只欠成都萬里行

樂士宣鵲鵲圖

宣和
畫工

彩羽暈明照影閒
蓼汀沙暖睡初殘
擊楊寄謝霜空鵲
輸與江湖百頃寬

四皓圖

山中日月到華胥
澗飲芝餐樂自殊
苦被留侯容不得
須教人彘事相污

送南冠徐子懌兵後還武昌

卧老盧龍塞下春故鄉心緒異鄉身燈前一展平安報
照眼清江月近人

故里依稀竹樹烟白頭此日是歸年多應秉燭東湖夜
夢裏相看一泣然

王摩詰驪山宮圖

安遠門西萬里餘耕桑烟火總民居只因勤政樓中夢
百倍華清樂不如

憶昔風流王右相開元親侍玉堂廬細吟凝碧池頭句

政恐丹青是諫書

跋張龍丘簪花圖

醉吟賞盡洛陽春老與坡仙作近隣未礙一枝長在眼

靜菴方寸本無塵

龍丘子晚居黃岡號靜菴居士與東坡為隣

荆氏周急圖

九縣颺馳到杞天禾廬櫛比豈容全指困能繼前賢舉
亦是君家識事權

宣和梅蘭圖

暈碧裁紅奪化權冰姿芳魄鬪春妍只因五柞宮中夢
不到幽香淡影邊

木有寒梅草有蘭色香宜作一圖看曾憂荆杞生庭戶
歲暮芟夷有至難

題張寶臣手卷

華裾織翠萬金身名動春坊劒字新全是當年天策府
經綸王業半儒臣

跋船子和尚圖

戢戢波間萬鮪遊一鈎那得盡回頭何如收却綸竿坐
明月千江任自由

漁樵閒話圖

艤舟弛擔兩欣然千古興亡話眼前忘却前溪歸路晚
暝烟橫合碧山巔

觀稼

朝餐不再腹為虛多稼雲連仰雨濡今日東城看佳色
預知糞壤是金珠

今年新桂米量珠日聽閭閻有殍夫縱使積金高北斗
不知能濟此饑無

烟鋪雲委泛晴光平遠風來粒米香鄒孟最深王道本
徑從五畝論耕桑

雨後看山

西山盡日塵土面一雨朝來膏沐容晴霽最堪圖畫處
白雲零亂點高峰

竹林七賢圖

森森烟玉太行秋
七子徜徉結勝遊
笑殺阿戎真俗物
出山能幾執牙籌

魏晉清談倡若徒
永嘉東播洛爲墟
大書不削陽秋筆
更着丹青詫隱居

讀文中子傳

書成復性纔稱訓
道見原人本自文
聖學操存原不易
白溪猶有淺深分

山壑萬松圖

髯龍落落不凡材萬壑蒼烟鬱未開絕似澗阿幽隱士
苦嫌塵土不歸來

巖風諤諤泛秋聲展放橫披眼便明酷似龍山山正北
兩崖陰合記經行

大厦圯傾要棟梁萬材于此鬱蒼蒼正須叮囑工師輩
為桷為榱細選量

構厦先論大匠賢
榱桷闌不相捐何當剪伐長材外
乞與坡仙作竈烟

讀開元天寶間事

庭燔錦繡初年事
矯枉情過久復歸鄒孟一言垂至戒
大臣無似格君非

常山不屈平生節
中令能明死後忠
未若廣平還具眼
當朝終不賞邊功

李龍眠二駿圖

突嚙相忘絡腦羈沙平
春淨草淒迷後人莫作丹青看
特為南華釋馬蹄

遼夏尋盟靜塞塵駟駟歸逸華山雲當時駉牝三千匹
辦與龍眠策畫勲

候廉相病

詩書素業清時樂草木平泉四季春
議取相君無妄疾
自來憂道不憂貧

金華恩眷見來深李泌初無富貴心
琴裡南風如解慍

正煩吹起傅巖霖

一作況是岱雲能寸
合肯教空作傅巖陰

當年匹馬走雷風氣壓秦川百二雄
今日露華欄檻底

秋絲爭吐看青蟲

貧不能移貴不驕丈夫到此是雄豪何當慰滿蒼生望
卧看東山月影高

明皇按樂圖

羽曲調音到克諧宮中花柳四時開五絃儘有南薰手
却喚花奴解穢來

興慶宮池水殿深帝心橫潰溺娃淫讓皇交愛情何切
獨為君王辨八音

逸圖零落御前幘心醉華清按樂聲擊損碧梧緣底事
促教秋雨劒關行

李伯時二馬圖

肉駿連錢汗血無絕足日與駑駘俱何當與馭虎將髀
蹴踏逋孽閩東隅

承顏堂

舉世紛紛說奉承色窮愉婉古難能近因細讀蘇公傳
眷戀庭幃有足稱

太子府戊寅夏六月廿日千秋節同承旨姚公

尚書許公行香口號

入朝已盡三嚴鼓禮佛重行繞殿香洞戶啟時宮燭迥
五雲高處少微光

前星光彩日重暉幻海風烟動羽旗曲暝未終閒委佩
朶頤廊下看靈龜

將入宮夜夢一大龜飛舞余
前明日祝壽畢遂得觀大龜

沉沉蘭殿寶香薰濟濟衣冠四皓賓識取元良無算壽
斂時多福錫生民

時奏停
運司

題沁州杜敬夫醉經堂沁春秋時地名銅鞮即

文中子祖父故居銅川地

金沙霧散滿懷春
總為從來味道醇
酣適愈深心愈樂
不任梧杓復何人

聖賢真味日陶然
王氏遺書有正傳
河上丈人如見問
却還糟粕到銅川

飲食誰非飽即嬉
至論真味幾人知
六經奧旨醲于酒
不到沈酣總啜醅

李相師詩

并序

伏以簾垂坐卜蜀君平祿命雖高目擊道存
袁客師人倫尤妙嵩巖處士李君術窺鬼眼
鑑洞清霄馳聲於京華二十年閱人于市樓
幾百輩多因勢解紛之說無虛高過譽之辭
待詔宮車屢承恩眷直氣曾驚於戶牖微言
預兆於機祥為賦新詩先書小序

霧隱雲驤虎豹文眼中歷歷說承恩羨君風鑑
何精切曾博紅雲一笑溫

萬事心藏到隱微一言能發靜中機聖皇臨御思賢切
識取新豐馬布衣

過仁宗陵

道出黑石渡同宣慰陳慶甫遊仁宗陵後宋人曾有
詩云干戈銷弭歲年登邊將無功更不能四十三年

那忍說暗垂雙淚過昭陵

見朱晦翁語錄

猗蘭被路柏圍城此日秋禾滿廢陵伊洛水南崧少後
丙午六月記來曾

題承顏堂卷

近讀程氏遺書論曾子耘瓜誤斬其根曾皙建大杖以擊其背曾子仆地不知人事良久而蘇欣然而進曰大人用力教參得無疾乎乃退援琴而歌使知體康孔子聞而怒曾子至孝如此亦有這些失處若是舜百事從父母只殺他不得又問申生待烹之事如何曰此只是恭也若舜須逃也前日題此卷詩意偶與此合喜為錄附其後

小雅報勞天罔極南陔致養戒何深浚完井廩從多故
一順能全是舜心

題理宗所題宮扇

拱手深宮四十年只將詩酒鬪清妍料應一片江湖夢
不到謝玄淝水邊

跋嘉祐熙寧間李昭珙所受告身三通

愛樹懷賢自昔然眼中真宰見差肩因思近代文明最
無似嘉熙慶厯年

跋秦王擒竇建德圖

天命人心已有歸
怒虜抗獄欲何為
自將五載飛揚舉
辦作秦王破陣辭

王昭君出塞圖

絕色當年冠漢宮
誰移尤物使和戎
流連不重君王慾
延壽丹青似有功

朔漠風沙異紫臺
琵琶心事欲誰開
人生正有新知樂
猶勝昭陽赤鳳來

讀趙飛燕傳

朱閣蒼廊向夜開
富平騶騎欲誰猜
微行笑殺張公子
併引昭陽赤鳳來

題黠鼠賦後

鼠喻雄深過柳州
竊時欺暴果誰尤
惠卿未死舒王在
悄悄孤懷為國憂

社鼠城狐固細微
不勞區處動嫌疑
何當論報堂堦下
免使區區若輩欺

豺豕磨牙到暴殘容身應媿豸為冠咄哉此輩何為者
未用區區許面謾

黃筌蜂蝶圖

翅粉翻香卷鐵鬚亭亭花影小華胥黃生筆底留深思
似與齊丘釋化書

鳳輦隨渠遠幸臨隔花望斷翠嬪心春風上下撲不得
飛過畫欄情更深

題劉君用可菴手卷

忤物能全古未聞正須多可應時人保身猶落婁公後
唾辱須防潔面嗔

題樂天不能忘情圖

病來心事轉蹉跎身外猶嫌長物多況是春歸留不得
侍兒無用蹙雙蛾

里陌鳴珂歲月深柳枝清唱伴長吟一朝並逐春風散
却是維摩示病心

悲鳴絡馬莫回頭說似余情久倦遊滿眼清伊石樓月

杖藜來往亦風流

龍門八節鑿來平千首新詩貯佛經只為暮年無可做
又留公案入丹青

青衫憔悴老江州放逐歸來萬事休止有醉吟情未減
又翻新樣柳枝愁

春風不到豸冠霜甚是溫柔與醉鄉展放畫圖還自笑
鬢絲先比樂天蒼

年四十二
髮已上白

題醉仙圖

瑤池清讌世空聞想像仙桃物外春
畫史恍從蓬島見丹青貌盡醉時真

等是高陽舊酒徒醉鄉真樂到華胥
不然有口難言際同向春風倒一壺

何物諸人作怪顛眼花落井口流涎
滔滔總是胡盧輩強著冠巾作散仙

公堂即事自箴

兩衙相並無尋丈一處煩囂一寂然
間有事來還徇却

俯慙於地仰慙天

門帖子

不期北里富薰天敢羨中朝日九遷喜見上旬壬子會
大家豐足過今年

題杜氏近仁堂

青青庭草我何殊物體方苞戒雜除致養此心能類長

一軒和氣際堪輿

一作一天生
意見方輿

我欲斯仁仁即至主人此理久相安兩椽寓舍中堂後

莫作王孫火竈看

心德由來萬善宗舉斯加彼即冲融不須苦向遺編泥
收取平時濟物功

漢署郎曹實要津不移居養幾何人粹然一點慈祥氣
辦與人間作好春

嫂趨井坎爭援手牛為穀鯨免釁鐘天理在人曾間斷
多君操守便從容

顏子拳拳善服膺豈徒歸美重名稱寥寥此意千年後

復禮名家見杜陵

博愛功多到靜深
虛懷猶用近為箴
煩君試閱金華事
何限當機利益心

跋燕肅牧羊圖

行飲溪流喜降阿
歸鞭影淡夕陽坡
似將濺濺維千角
辦作宣王考牧歌

平秩東皋事有餘
荒烟平楚散林墟
牧人例有繁多慶
蓑底秋江夢衆魚

題溫居士畫像

盛集賓筵每會逢
笑談端有古人風
如公耆舊今能幾
又逐秋江月影空

友真丰采動并門
處士流芳實裔孫
今日坐看磐石上
老成雖遠典刑存

自稱晉溫
友真之後

題魯人張仲和卿舒嘯亭手卷

蟻穴蜂衙起事機
人心無路到清夷
翛然笑煞東皇客
月白風清世不知

千山秋月照螺臺兩吻清風萬壑來吹作半空鸞鳳去
和公元是不凡材

己卯清明日雜詩時巡按南京

東風吹淨鎖窗塵落盡桃花別有春一樹青梅

闕

老

小湖山畔翠娥顰

早衙例向中時散宿酒禁持到日西步繞芳叢春不見
閒情還與碧雲低

千門萬戶記經行瓦礫場中問舊名一片清光春夜月

照人依舊十分明

吏散公堂日昃西暮雲樓閣自高低呢喃何處飛來燕
似為巢新快穩棲

雪妥紅翻點綴春桃花錦爛柳條新那知春事都無意
燕子爭來強語頻

我近南來石濟津暖烟晴日欲烘春自從入得清明節
連日春陰殢殺人

汴梁清明

連日風沙此日晴東君有意作清明垂鞭醉入宮城去
一片傷心畫不成

寒食日過隆德宮

當年陸海駭珍藏此日繁華墮渺茫春草不隨人事換
依然分翠入宮牆

題孫郎中孝友峯

小穿沙磧到玲瓏底事題為孝友峰長着紫荊庭樹影
鞠哀天顯表沖容

館史開府第宅

石欄春靜雨留臺
江漢堂深又獨來
前日平泉門下客
一花一草總興哀


宮牆

一片摧頽當道危
風前竹色想依依
偶逢白髮宮前叟
指顧因渠得禁闥

秋澗集卷二十七

謹按卷二十五第十五頁前七行喇嘛舊作拉馬今改





總校官進士臣胡榮

校對官學正臣卜惟吉

膳錄監生臣陸朝愈